

## REGIONAL NEWS

HEADLINES:-

1. Law & Judicial Minister Pu TJ.Lalnuntluangan NEC sum cheng nuai 685 senga sak tur 'Passion Fruit Processing Unit' lungphum chu New Champhai ah a phum.
2. MNF MLA thin Dr K Beichhua chu BJP ah nizan khan lawmluh a ni.
3. Israel chuan Palestinian hel Hamas-in Gaza Strip an beih chiam vangin indo mai thei tura inralrinna thu a puang.
4. Prime Minister Narendra Modi-a chuan Asian Games-a India Medal 100-na latu Indian Kabaddi hmeichhe team-te a lawmpui thu a sawi.

&lt;&gt;&lt;&gt;&lt;&gt;

CHAMPHAI

Law & Judicial Minister Pu TJ.Lalnuntluangan North Eastern Council (NEC) sum cheng nuai 685 senga sak tur Sapthei sawngbawlna hmunpui 'Passion Fruit Processing Unit' lungphum chu New Champhai ah a phum.

Hemi puala inkhawm, Champhai DC Pu James Lalrinchhana kaihhruaiah Pu TJ Lalnuntluanga chuan thu sawiin Champhaia kuthnathawktu, sapthei chingtuten an harsatna leh mamawhnate a hnena anlo thlen thin chu bawhzuiin 'Passion Fruit Processing Unit' Champhaia din tur hian Sawrkar Laipui Ministry of Food Processing te pawh tum engemawzat an dawr thu leh NEC hnuaiah tih hlawhtlin anih tak thu a sawi a ni.

'Passion Fruit Processing Unit' chu hmasawinna daih rei leh tlo neih theihna tura hmalakna pawimawh tak a nih thu sawiin, State leh District economy chawikanna tura project pawimawh tak a ni, a ti a. He project hmalakna kal mekah hian Mualkawi leh Ngur khua ah te Horticulture Department hmalaknain pioneer project-in kuthnathawktuten sapthei an chin chhoh mek thu a sawi a, he project a hlawhtlin ngei theihnan kuthnathawktute chu lo inpuahchah tura sawmin, thawhho puiah a sawm a ni.

&lt;&gt;&lt;&gt;&lt;&gt;

KOLASIB

Minister Pu K. Lalrinliana, Kolasib bialtu MLA chuan tukin zkhan Formosa Foundation India kal tlanga hmuh Mini Ventilator chu District Hospital Kolasib hnenah hlanin, Oxygen Concentrator chu Kolasib Sub-Headquarters YMA hnuaia Branch thlan bik 20 hnenah a hlan bawk.

Pu K. Lalrinliana chuan, Formosa Foundation India-in COVID-19 hri len laia ÷anpuina chi hrang hrang an kalpui dan leh sawrkar a chhawk zangkhai dan sawiin, damlohna leh chetsual thil ah mamawhna a sang chho zel a, damdawi ina inenkawl ngaihna awm tawh lo, in lama inenkawlte tan a pawimawhin a ÷angkai leh zual a, khua/veng tinah kawh theih ni se duhthusam a ni a ti a, tuna dawng ve lo leh la nei lote tan pawh ngaihtuhsak zel a tum thu a sawi a ni.

He hun hi Kolasib Sub-Headquarters YMA Vice President Pu C. Lianlunga'n a kaihruai a. District Hospital Kolasib-a dah tur Mini Ventilator hi District Medical Superintendent (DMS), Dr Samuel Lalfakawma Fanai chuan a dawng a. Oxygen concentrator chu Branch YMA ai aw h ÷heuhthe'n an dawng thung a ni.

(Andrew Kolasib PTC)

&lt;&gt;&lt;&gt;&lt;&gt;

## K BEICHHUA

MNF MLA thin Dr K Beichhua chu MNF Party a chhuahsan hnuah Union Minister of State for Minority Affairs Jon Barla an BJP ah nizan khan a lawm lut a,

Lawm luh inkhawm Aizawla buatsaih chu Pu Vanlalhmuaka BJP Mizoram State President in kaihruaiin, he hunah hian Nagaland Dy CM Pu Y Patton te, Assam Dy Speaker Pu Numal Momim te, BJP National Secretary, NE Jt Co-ordinator Pu Rituraj Sinha te, Tripura State MLA te bakah Dr BD Chakma BJP MLA te an tel a ni.

Pu Barla-a chuan Mizoram MLA nilai in BJP a zawm chu lawm awm an tiin an hlim hle tih a sawi a, BJP chuan mi taima leh hnathawk tha apiang te hi mipui tana rawngbawl turin an thlang chhuak thin a ti a, amah pawh Kristian ni chung leh a bial chhunga Kristian sing hnikhat chauh an awm laiin, Vote Nuai 7 chuang hmu a thlan tlin a ni thei tih a sawi a, hnam tlem zawk Minority te chu BJP chuan a ngaihsak hle a, hnam hnuaihnuang anga lang leh hnam tlem zawk ten India ram hruaitu nihna chanvo pawimawh tak tak te chu an chelh ta a ni a ti.

<><><>

## LALPA CHHIAHHLAWH INTELKHAWM

Lalpa Chhiahhlawh Intelkhawm hruaitu Rev Dr Zaichhawna Hlawndo chuan Serlui Assembly biala an pawl aiawha ding tur chu Pu Vanlalnghaka, Saipum anih thu Kolasib Press Club-ah a puang a, candidate leh thuthar thehdarhtute inhmelhriattirna hun a hmang nghal a ni.

Dr Zaichhawna chuan. Lalpa Chhiahhlawh Intelkhawm te chu bial tin a ding tura an inbuatsaih mek thu leh independent a ding tur zawng zawng chuan thuthlung khat, symbol pakhat 'zungbun' an hmang dawn tih a sawi a, Pathian Lalram Sawrkar Hmathlir chu Party Manifesto ang a ni lo a, khawvel rama la ding ngai lo, democracy rama la piang ngai lo ram leh hnam din chhuahna tur leh Zofate mahnia ro in rel, independent nation kalkawng tur a ni a ti.

<><><>

## SERCHHIP ELECTION

Kumina State Assembly inthlanpui buatsaih tur pualin Serchhip ah pawh ngawrh taka inbuatsaih mek a ni a, vawiin khan Additional DC Pu James Lalnithanga hovin Serchhip DC Conference Hall-ah meeting a ni a. Serchhip District chhunga Assembly Constituency 3-a candidate-te campaign senso chhutna atana hman tur thil man an bituk a ni.

Election Commission of India chuan Mizoram Legislative Assembly Inthlanpuiah hian Candidate tin ten inthlan sensoah cheng nuai 28 aia tam an hmang tur a ni lo, tiin a bituk a. Inthlan puan a nih atangin party tin te campaign senso chhut tan a ni tawh dawn a. Senso awm thei tur ni awm anga lang chi hrang hrang – aurinna, pandal siam, flag, poster, banner leh hoarding, lirthei hawh man, ei tur leh riah man, hall leh thuthleng hawh man leh a dangte bakah electronic, print leh social media a fakna chhuah man te chu ngun taka ngaihtuah a ni a. Rate hman lai mek te sawiho niin lungrual takin an bithliah a ni.

He hunah hian Election Officer, DIPRO leh official dangte bakah Political party hrang hrang aiawh te an tel a ni.

<><><>

## JAC

Mizorama mamawh bungraw phur inzawmkhawm Joint Action Committee chuan Mizoram ei leh bar lakluhna kawng chhe lutuk siamthat phutin karleh thawhtanni atangin sorkar kar nan Sairang leh Vairengte inkar chu tlan loh an tum tih an sawi a.

Joint Action Committee-ah hian Mizoram Truck Owners Association, Truck Driver's Association, Mizoram Tippers Driver and Owners Association, Mizoram Oil Tanker Drivers Association leh Kolasib District Drivers Welfare Association te an tel a, Mizoram Truck Owner President B. Lalzarzova chuan tun dinhmunah Mizoram ei leh bar lakluhna kawng Sairang to Vairengte, Kawlkuh to Hliappui, Kawlkuh to Tuichang leh Aizawl leh Imphal inkar te chu kawng a chhe nasa hle a ti a, kawng chhe zual tal siam that anih loh chuan Karleh thawhtanni atangin bungraw phur motor zawng zawng Sairang leh a Vairengte inkar leh Manipur lam atanga chak lakna kawnga tlan thin te an tlan dawnlo an ti a, an hmalakna zawmin Kolasib Maxi Cab te pawhin tlan loh an tum tih a sawi bawk.

An President sawi danin Mizoram kawng chhe chungchang hi thuneitute hnenah anlo thlen thin a, sawrkarin a thawm that mai beiseiin hun rei tak an nghak a, hmalakna engmah a awm mai loh avangin tun dinhmun an thleng ta a a ni.,Kawng chhiat avangin Motor tamtak a chetsual; phah a, thenkhat a chhiat phah a ti a, heng harsatna hrang hrang thleng avangin kawng chhia chu karleh thawhtanni zing dar 7 atanga zawh rih loh phawt ni se tih an sawi a, tlan tlaka thawm that anih hma loh chuan kawng chu zawh rihloh mai ni se tih an sawi bawk.

Joint Action Committee chuan an hmalakna chu Mizoram kawngin hma a sawn theih nana ti anni a ti a, ram hmasawna tur anih avangin mipuiten thlawp theuh turin an ngen tih an sawi bawk.

<><><>

## ACCIDENT

Tukin dar 9:00 vel khan National Highway 108 Mamit leh Bawngva inkarah Tipper leh Bike an insu a, Bike khalhtu Lalrinsanga kum 22, Bawngva khua chu a hmunah a thi.

Mamit police station atanga thu dawn danin Tipper hi Mamit lam atanga Bawngva lam pan a ni a, Bawngva lam atanga Mamit lam pan Bike nen hian Mamit leh Bawngva inkar Suangsau lui sir kawng ngil laiah an insu a ni.

He thil thlengah hian Mamit police ten hma la nghalin an chhui chiang mek a ni.

<><><>

## BLOOD DONATION

Serchhip Pastor Bial KTP huamchhung Branch 3 a KTP member te chuan Serchhip Hospital Blood Bankah a mamawh apiangte hman turin thisen an pe a, Thisen petute hi Mipa 24 leh Hmeichhia-6 an ni a ,A vaiin Unit -30 an pe a ni.

<><><>

ISRAEL DECLARES "STATE OF WAR ALERT" FOLLOWING HAMAS ATTACK

Israel Defence Forces (IDF) chuan vawiina Palestinian hel Hamas-in rocket hmanga Gaza Strip a beih hnuin indo mai thei tura inralrinna thu (State Of War alert) a puang.

Hamas firfiak pawlte hian Israel chhim lam chu an luhchilh chiam a, Israel hi rocket sang telin an kap zui a. Tun tum hi kum tam tak kalta chungga Islamist chetthawhnaa Israel-in beih a la tawh nasat ber tum a ni.

Ralthuam kenga ramri kana luh thua tup tupte chuan hmeichhe pakhat an kaphlum a, midang 15 an hliam ni-a sawi a ni. Israel pum puiah boruak atangin ralkher dar tihrik a ni a. IDF chuan Gaza ramri hmun hrang hrangah mi firfiakte hi an lut sup sup tih an nemnghet a. An tum bik an bitum nghal avangin mipuite chu inchhung lama tawm tura thupek an ni bawk.

Israel Prime Minister Benjamin Netanyahu chuan venhimna lama thuneitu sangte emergency meeting a ko nghal a. Israel Security Cabinet chu Tel Aviv-a Israel Defense Forces' headquarters-ah an thukhawm nghal bawk ang. Prime Minister office thuchhuahin a sawi danin venhimna lama thil pawimawh zirchian mek a ni.

<><><>

INDIA ADVISES ITS NATIONALS IN ISRAEL TO OBSERVE SAFETY PROTOCOLS IN VIEW OF CURRENT SITUATION

India chuan Israel boruak thlir chungin Israel-a India mi awmte chu bengchhi renga awm tur leh an himna ngaipawimawh turin a chah.

Israel-a Indian Embassy chuan India mite chu an himna tur dan zawm a, tul lova che chhuak lo tur te, tawm himna tur hmun hlata awm lo turtein a chah a. Rikrum thila Embassy biak pawh a tul chuan phone no 9723 5226 748 ah biak theih a ni a, [cons1.telaviv@mea.gov.in](mailto:cons1.telaviv@mea.gov.in) - ah thu thawn theih a a ni bawk.

<><><>

INDIA ACHIEVES HISTORIC 100-MEDAL MARK WITH WOMEN KABBADI WIN IN ASIAN GAMES

Prime Minister Narendra Modi-a chuan Asian Games-a India Medal 100-na latu Indian Kabaddi hmeichhe team-te chu a lawmpui thu a sawi a. India Kabaddi hmeichhe team hian vawiin khan an khingpui Taipei hnehin gold medal an la a ni.

Narendra Modi-a chuan social media-a a thu tarchhuahah tun hi Asian Games-a India chanchinah thil chhinchhiah tlak a ni a ti a. He hnehna hi India hmeichhe infiam mite chu hneh theih an ni lo tih tichiangtu a ni a ti. Prime Minister chuan he hlawhtlinna hi India chuan a chhuang hle a ni a ti a. An hma lam hun atan a tha ber a duhsakpui thu a sawi bawk.

Heti hian Hangzhou, China-a nghah Asian Games-ah India chuan medal 105 a la ta a, chungte chu gold 28, silver 36 leh bronze 41 a ni.

Tun tum hi Asian Games-a India-in medal za a lak tlin vawi khatna a ni a. Games liantham dang - Olympics, Commonwealth Games leh Asian Games huapa medal za chuang a lak vawi 2-na a ni bawk. India hian kum 2010-a New Delhi-a nghah Commonwealth Games-ah khan medal 101 a lo la tawh a ni.

<><><>